

四庫全書

集部

欽定四庫全書

集部

白氏長慶集卷十九

二十九

詳校官監察御史_臣查瑩

檢討_臣何思鈞覆勘

總校官知縣_臣繆琪

校對官助教_臣卜惟吉

謄錄監生_臣張同履

欽定四庫全書

白氏長慶集卷十九

唐白居易撰

律詩

五言七言自兩韻至四十韻凡一百首

吟元郎中白鬚詩兼飲雪水茶因題壁上

吟詠霜毛句閒嘗雪水茶城中展眉處只是有元家

吳七郎中山人待制班中偶贈絕句

金馬東門隻日開漢庭待詔重仙才第三松樹非華表

那得遼東鶴下來

和張十八秘書謝裴相公寄馬

齒齋臆

卑遙切肥也或作膘

足毛頭膩祕閣張郎叱撥駒洗了頷

花翻假錦走時蹄汗蹋真珠青衫昨見曾驚否紅粟難
賒得飽無丞相寄來應有意遣君騎去上雲衢

答山侶

領下髭鬚半是絲光陰向後幾多時非無解挂簪纓意
未有支持伏臘資冒熱衝寒徒自取隨行逐隊欲何為

更慙山侶頻傳語五十歸來道未遲

早朝思退居

霜嚴月苦欲明天忽憶閒居思浩然自問寒燈夜半起
何如暖被日高眠唯慙老病披朝服莫慮飢寒計俸錢
隨有隨無且歸去擬求豐足是何年

曲江亭晚望

曲江岸北凭欄干水面陰生日脚殘塵路行多綠袍故
風亭立久白鬚寒詩成閣著閒心記山好遙偷病眼看

不被馬前提省印何人信道是郎官

初除主客郎中知制誥與王十一李七元九三

舍人中書同宿話舊感懷

閒宵靜語喜還悲聚散窮通不自知已分雲泥行異路
忽驚雞鶴宿同枝紫垣曹署榮華地白髮郎官老醜時
莫怪不如君氣味此中來校十年遲

西省對花憶忠州東坡新花樹因寄題東樓

每看闕下丹青樹不忌天邊錦繡林西掖垣中今日眼

南賓樓上去年心
花含春意無分別
物感人情有淺深
最憶東坡紅爛熳
野桃山杏水林檎

寄題忠州小樓桃花

再遊巫峽知何日
總是秦人說向誰
長憶小樓風月夜
紅欄干外兩三枝

中書連直寒食不歸因憶元九

去歲清明日南巴
古郡樓今年寒食夜
西省鳳池頭併
上新人直難隨舊
伴遊誠知視草貴
未免對花愁鬢髮

莖莖白光陰寸寸流經春不同宿何異在忠州

春憶二林寺舊遊因寄郎滿晦三上人

一別東林三度春每春常似憶親情頭陀會裏為逋客
供奉班中作老臣清淨久辭香火伴塵勞難索幻泡身
最慙僧社題橋處十八人名空一人

和元少尹新授官

官穩身應泰春風信馬行縱忙無苦事雖病有心情厚
祿兒孫飽前驅道路榮花時八入直無暇賀元兄

朝迴和元少尹絕句

朝客朝回回望好
盡紆朱紫佩金銀
此時獨與君為伴
馬上青袍唯兩人

重和元少尹

鳳閣舍人京亞尹
白頭俱未著緋衫
南宮起請無消息
朝散何時得入銜

中書夜直夢忠州

閣下燈前夢巴南
城裏遊覓花來渡口
尋寺下山頭江

色分明綠猿聲依舊愁禁鐘驚睡覺唯不上東樓

醉後

酒後高歌且放狂門前閒事莫思量猶嫌小戶長先醒
不得多時住醉鄉

待漏入閣書事奉贈元九學士閣老

衙排宣政仗門啓紫宸闕彩筆停書命花輒趨立班稀
星點銀礫殘月墮金環闔漏猶傳水明河漸下山從東
分地色向北仰天顏碧縷爐煙直紅垂珮尾閒綸闈慚

並入翰苑忝先攀笑我青袍故饒君齒

倉見切染紅草也綬殷

詩仙歸洞裏酒病滯人閒好去鴛鴦侶冲天便不還

晚春重到集賢院

官曹清切非人境風日鮮明是洞天滿砌荆花鋪紫毯

吐敢切

隔牆榆莢撒青錢前時謫去三千里此地辭來十

四年虛薄至今慚舊職院名擡舉號為賢

紫薇花

絲綸閣下文書靜鐘鼓樓中刻漏長獨坐黃昏誰是伴

紫薇花對紫薇郎

後宮詞

雨露由來一點恩，爭能遍布及千門。
三千宮女胭脂面，幾箇春來無淚痕。

卜居

遊宦京都二十春，貧中無處可安貧。
嘗羨蝸牛猶有舍，不如碩鼠解藏身。
且求容立錐頭地，免似漂流木偶人。
但道吾廬心便足，敢辭湫隘與囂塵。

題新居寄元八

青龍岡北近西邊移入新居便泰然
冷巷閉門無客到
煖簷移榻向陽眠
階墀寬窄纔容足
牆壁高低粗及肩
莫羨昇平元八宅
自思買用幾多錢

登龍尾道南望憶廬山舊隱

龍尾道邊來一望
香爐峯下去無因
青山舉眼三千里
白髮平頭五十人
自笑形骸紆組綬
將何言語掌絲綸
君恩壯健猶難報
況被年年老逼身

馮閣老處見與嚴郎中酬和詩因戲贈絕句

乍來天上宜清淨不用回頭望故山縱有舊遊君莫憶
塵心起即墮人間

見于給事暇日上直寄南省諸郎官詩因以戲
贈

倚作天仙弄地仙誇張一日抵千年黃麻敕勝長生錄
白紵詞嫌內景篇雲彩誤居青瑣地風流合在紫微天
東曹漸去西垣近鶴駕無妨更著鞭

題新昌所居

宅小人煩惱泥深馬鈍頑街東閒處住日午熱時還院
窄難栽竹牆高不見山唯應方寸內此地覺寬閒

西省北院新構小亭種竹開窓東通騎省與李

常侍隔窓小飲各題四韻

結託白鬚伴因依青竹叢題詩新壁上過酒小窓中深
院晚無日虛簷涼有風金貂醉看好回面紫垣東

酬元郎中同制加朝散大夫書懷見贈

命服雖同黃紙上官班不共紫垣前青衫脫早差三日
白髮生遲較九年曩者定交非勢利老來同病是詩篇
終身擬作臥雲伴逐月須收燒藥錢五品足為婚嫁主
緋袍著了好歸田

初著緋戲贈元九

晚遇緣才拙先衰被病牽那知垂白日始是著緋年身
外名徒爾人間事偶然我朱君紫綬猶未得差肩

和韓侍郎苦雨

潤氣凝柱礎繁聲注瓦溝
閣留窓不曉涼引簾先秋葉
濕蟪應病泥稀燕亦愁
仍聞放朝夜誤出到街頭

連雨

風雨閣蕭蕭雞鳴暮復朝
碎聲籠苦竹冷翠落芭蕉
水鳥投簷宿泥蛙入戶跳
仍聞蕃客見明日欲追朝

初加朝散大夫又轉上柱國

紫微今日煙霄地赤嶺前年泥土身
得水魚還動鱗鬣
乘軒鶴亦長精神
且慙身忝官階貴未敢家嫌活計貧

柱國勲成私自問有何功德及生人

行簡初授拾遺同早朝入閣因示十二韻

夜色尚蒼蒼槐陰夾路長聽鐘出長樂傳鼓到新昌宿

雨沙堤潤秋聲樺

胡卦切

燭香馬驕欺地軟人健得天涼

待漏排闥闥停珂擁建章爾隨黃閣老吾次紫薇郎並

入連稱籍齊趨對折方闢班花接萼綽立鴈分行近職

誠為美微才豈合當綸言難下筆諫紙易盈箱老去何

僥倖時來不料量唯求殺身地相誓答恩光

立秋日登樂遊園

獨行獨語曲江頭
回馬遲遲上樂遊
蕭颭涼風與衰鬢
誰教同會一時秋

新秋早起有懷元少尹

秋來轉覺此身衰
晨起臨階盥漱時
漆匣鏡明頭盡白
銅餅水冷齒先知
光陰縱惜難留住
官職雖多得已遲
老去相逢無別計
強開笑口展愁眉

夜筭

紫袖紅絃明月中自彈自感閨低容絃凝指咽聲停處
別有深情一萬重

妻初授邑號告身

弘農舊縣授新封鈿軸金泥誥一通我轉官階常自愧
君加邑號有何功花牋印了排窠濕錦標裝來耀手紅
倚得身名便慵墮日高猶睡綠窓中

送客南遷

我說南中事君應不願聽曾經身困苦不覺語丁寧燒

處愁雲夢波時憶洞庭春
畬煙勃勃秋瘴露冥冥蚊蚋
經冬活魚龍欲雨腥水蟲能射影
山鬼解藏形穴掉巴
蛇尾林飄鳩鳥翎颶風千里黑
藪徐廉切
山菜也草四時青客
似驚弦鴈舟如委浪萍誰人勸
言笑何計慰漂零慎勿
琴離膝長須酒滿瓶大都從此
去宜醉不宜醒

暮歸

不覺百年半何曾一日閒
朝隨燭影出暮趁鼓聲還
甕裏非無酒牆頭亦有山
歸來常困臥早晚得開顏

寄遠

欲忘忘未得欲去去無由
兩腋不生翅二毛空滿頭
坐看新落葉行上最高樓
暝色無邊際茫茫盡眼愁

舊房

遠壁秋聲蟲絡絲入簷新影月低眉
牀帷半故簾旌斷
仍是初寒欲夜時

錢侍郎使君以題廬山草堂詩見寄因酬之

殷勤江郡守悵望掖垣郎
慙見新瓊什思歸舊草堂
事

隨心未得名與道相妨若不休官去人閒到老忙

寄山僧

時年五十

眼看過半百早晚掃巖扉白首誰留住青山自不歸百
千萬劫障四十九年非會擬抽身去當風抖擻衣

慈恩寺有感

時杓直初逝
居散方病

自問有何惆悵事寺門臨入却遲迴李家哭泣元家病
柿葉紅時獨自來

酬嚴十八郎中見示

口厭含香握厭蘭
紫薇青瑣舉頭看
忽驚鬢後蒼浪髮
未得心中本分官
夜酌滿容花色暖
秋吟切骨玉聲寒
承明長短君應入
莫憶家江七里灘

寄王祕書

霜菊花萎日風梧
葉碎時怪來秋思
苦緣詠祕書詩

中書寓直

繚繞宮牆圍禁林
半開閭闔曉沈沈
天晴更覺南山近
月出方知西掖深
病對詞頭慙彩筆
老看鏡面愧華簪

自嫌野物將何用
土木形骸麋鹿心

自問

黑花滿眼絲滿頭
早衰因病病因愁
宦途氣味已諳盡
五十不休何日休

曲江獨行招張十八

曲江新歲後
冰與水相和
南岸猶殘雪
東風未有波
偶遊身獨自
相憶意如何
莫待春深去
花時鞍馬多

新居早春二首

靜巷無來客深居不出門鋪沙蓋苔面掃雪擁松根漸
暖宜閒步初晴愛小園覓花都未有唯覺樹枝繁

地潤東風暖閒行蹋草芽呼童遣移竹留客伴嘗茶雷
滴簷水盡塵浮隙日斜新居未曾到隣里是誰家

新昌新居書事四十韻因寄元郎中張博士

冒寵已三遷歸朝始二年囊中貯餘俸園外買閒田狐
兔同三逕蒿萊共一壥新園聊刻穢舊屋且扶顛簷漏
移傾瓦梁欹換蠹椽平治遶臺路整頓近階甃巷狹開

客駕牆低壘過肩門閭堪駐蓋堂室可鋪筵丹鳳樓當
後青龍寺在前市街塵不到宮樹影相連省吏嫌坊遠
豪家笑地偏敢勞賓客訪或望子孫傳不覓他人愛唯
將自性便等閒栽樹木隨分占風煙逸致因心得幽期
遇境牽松聲疑澗底草色勝河邊虛潤冰銷地晴和日
出天苔行滑如簟莎坐軟於絲簾每當山卷帷多待月
褰籬東花掩映窓北竹嬋娟迹慕青門隱名慙紫禁仙
假歸思晚沐朝去戀春眠拙薄才無取疎慵職不專題

牆書命筆沾酒率分錢柏杵春靈藥銅瓶漱暖泉爐香
穿蓋散籠燭隔紗然陳室何曾掃陶琴不要絃屏除俗
事盡養活道情全尚有妻孥累猶為組綬纏終須拋爵
祿漸擬斷腥羶大抵宗莊叟私心事竺乾浮榮水劃字
真諦火生蓮梵部經十二玄書字五千是非都付夢語
默不妨禪博士官猶冷郎中病已痊多同僻處住久結
靜中緣緩步攜筇杖徐吟展蜀箋老宜閒語話悶憶好
書篇蠻榼來方瀉蒙茶到始煎無辭數相見鬢髮各蒼

然

喜敏中及第偶示所懷

自知羣從為儒少豈料詞場中第頻桂折一枝先許我

楊穿三葉盡驚人

始予進士及第行簡次之敏中又次之

轉於文墨須留

意貴向煙霄早致身莫學爾兄年五十蹉跎始得掌絲

綸

久不見韓侍郎戲題四韻以寄之

近來韓閣老疎我我心知戶大嫌甜酒才高笑小詩靜

吟乘月夜閒醉曠花時還有愁同處春風滿鬢絲

寄白頭陀

近見頭陀伴云師老更慵性靈閒似鶴顏狀古於松山
裏猶難覓人間豈易逢仍聞移住處太白最高峯

和韓侍郎題楊舍人林池見寄

渠水閣流春凍解風吹日炙不成凝鳳池冷暖君諳在
二月因何更有冰

勤政樓西老柳

半朽臨風樹多情立馬人開元一株柳長慶二年春

偶題閣下廳

靜愛青苔院深宜白髮翁貌將松共瘦心與竹俱空暖
有低簷日春多颺幕風平生閒境界盡在五言中

予與故刑部李侍郎早結道友以藥術為事與
故京兆元尹晚為詩侶有林泉之期周歲之
閒二君長逝李住曲江北元居昇平西追感
舊遊因貽同志

從哭李來傷道氣自亡元後減詩情金丹同學都無益
水竹隣居竟不成月夜若為遊曲水花時那忍到昇平
如年七十身猶在但恐傷心無處行

送馬舍人閣老往襄陽

紫微閣底送君回第二廳簾下不開莫戀漢南風景好
峴山花盡早歸來

莫走柳條詞送別

南陌傷心別東風滿把春莫欺楊柳弱勸酒勝於人

酬韓侍郎張博士雨後遊曲江見寄

小園新種紅櫻樹閒遶花行便當遊何必更隨鞍馬隊
衝泥蹋雨曲江頭

元家花

今日元家宅櫻桃發幾枝
稀稠與顏色一似去年時
失却東園主春風可得知

代人贈王負外

好在王負外平生記得不
共賒黃叟酒同上莫愁樓靜

接殷勤語狂隨爛熳遊
那知今日眼相見冷於秋

惜小園花

曉來紅萼凋零盡
但見空枝四五株
前日狂風昨夜雨
殘芳更合得存無

蕭相公宅遇自遠禪師有感而贈

宦途堪笑不勝悲
昨日榮華今日衰
轉似秋蓬無定處
長於春夢幾多時
半頭白髮慙蕭相
滿面紅塵問遠師
應是世閒緣未盡
欲拋官去尚遲疑

草詞畢遇芍藥初開因詠小謝紅藥當堦翻詩

以為一句未盡其狀偶成十六韻

罷草紫泥詔起吟紅藥詩詞頭封送後花口拆開時坐
對鈎簾久行觀步履遲兩三叢爛熳十二葉參差背日
房微斂當堦朶旋欹釵葶抽碧股粉蘂撲黃絲動蕩情
無限低斜力不支周迴看未足比諭語難為勾漏丹砂
裏焦僥火焰旗彤雲賸根蒂絳幘欠纓綏況有晴風度
仍兼宿露垂凝香熏罨畫似淚著胭脂有意留連我無

言怨思誰應愁明日落如恨隔年期
菡萏泥連萼玫

音梅

瑰音回刺繞枝等量無勝者唯眼與心知

喜張十八博士除水部負外郎

老何歿後吟聲絕雖有郎官不愛詩
無復篇章傳道路
空留風月在曹司
長嗟博士官猶屈
亦恐騷人道漸衰
今日聞君除水部
喜於身得省郎時

與沈楊二舍人閣老同食敕賜櫻桃翫物感恩

因成十四韻

清曉趨丹禁紅櫻降紫宸
驅禽養得熟和葉摘來新
圓轉盤傾玉鮮明籠透銀
內園題兩字西掖賜三臣
熒惑晶華赤醍醐氣味真
如珠未穿孔似火不燒人
杏俗難為對桃頑詎可倫
肉嫌盧橘厚皮笑荔枝皴
瓊液酸甜足金丸大小勻
偷須防曼倩惜莫擲安仁
手擘纔離核匙抄半是津
甘為舌上露煖作腹中春
已懼長尸祿仍驚數食珍
最慙恩未報飽餒不才身

送嚴大夫赴桂州

地壓坤方重官兼憲府雄桂林無瘴氣栢署有清風山
水衙門外旌旗艘音艘中大夫應絕席詩酒與誰同

春夜宿直

三月十四夜西垣東北廊碧梧葉重疊紅藥樹低昂月
砌漏幽影風簾飄閣香禁中無宿客誰伴紫薇郎

夏夜宿直

人少庭宇曠夜涼風露清槐花滿院氣松子落堦聲寂
寞挑燈坐沈吟跼月行年衰自無趣不是厭承明

七言十二句贈駕部吳郎中七兄

時早夏朝歸
閉齋獨處偶

題此
什

四月天氣和且清
綠槐陰合沙堤平
獨騎善馬銜鐙穩
初著單衣肢體輕
退朝下直少徒侶
歸舍閉門無送迎
風生竹夜窓閒臥
月照松時臺上行
春酒冷嘗三數盞
曉琴閒弄十餘聲
幽懷靜境何人別
唯有南宮老駕兄

玉真張觀主下小女冠阿容

綽約小天仙
生來十六年
姑山半峯雪
瑤水一枝蓮
晚

院花留立春窓月伴眠迴眸雖欲語阿母在傍邊

龍花寺主家小尼

郭代公愛姬薛氏幼嘗為尼小名仙人子

頭青眉眼細十四女沙彌夜靜雙林怕春深一食飢步
慵行道困起晚誦經遲應似仙人子花宮未嫁時

訪陳二

曉垂朱綬帶晚著白綸巾出去為朝客歸來是野人兩
矜脚過日一榻足容身此外皆閒事時時訪老陳

晚亭逐涼

送客出門後移牀下砌初趨涼行繞竹引睡臥看書老
更為官拙傭多向事疎松窓倚藤杖人道似僧居

曲江憶李十一

李君歿後共誰遊柳岸荷亭兩度秋獨遶曲江行一匝
依前還立水邊愁

江亭翫春

江亭乘曉閱衆芳春妍景麗草樹光日消石桂綠嵐氣
風墜木蘭紅露漿水蒲漸展書帶葉山榴半含琴軫房

何物春風吹不變愁人依舊鬢蒼蒼

聞夜砧

誰家思婦秋擣帛月苦風淒砧杵悲八月九月正長夜
千聲萬聲無了時應到天明頭盡白一聲添得一莖絲

板橋路

梁苑城西二十里一渠春水柳千條若為此路今重過
十五年前舊板橋曾共玉顏橋上別不知消息到今朝

青門柳

青青一樹傷心色曾入幾人離恨中為近都門多送別
長條折盡減春風

梨園弟子

白頭垂淚語梨園五十年前雨露恩莫問華清今日事
滿山紅葉鎖宮門

暮江吟

一道殘陽鋪水中半江瑟瑟半江紅可憐九月初三夜
露似真珠月似弓

思婦眉

春風搖蕩自東來折盡櫻桃綻盡梅
惟餘思婦愁眉結
無限春風吹不開

怨詞

奪寵心那慣尋思倚殿門
不知移舊愛何處作新恩
空閨怨

寒月沈沈洞房靜
真珠簾外梧桐影
秋霜欲下手先知
燈底裁縫剪刀冷

秋房夜

雲露青天月漏光中庭立久却歸房水窓席冷未能臥
挑盡殘燈秋夜長

採蓮曲

菱葉縈波荷颭風荷花深處小船通逢郎欲語低頭笑
碧玉搔頭落水中

隣女

娉婷十五勝天仙白日姮

胡登切

娥旱地蓮何處閒教顰

鷓鴣語碧紗窓下繡牀前

閨婦

斜凭繡牀愁不動紅綃帶緩綠鬟低
遼陽春盡無消息
夜合花前日又西

移牡丹栽

金錢買得牡丹栽何處辭叢別主來
紅芳堪惜還堪恨
百處移將百處開

聽夜箏有感

江州去日聽箏夜白髮新生不願聞如今況是頭成雪
彈到天明亦任君

代謝好妓答崔負外

青娥小謝娘白髮老崔郎謾愛胸前雪其如頭上霜別
後曹家碑背上思量好字斷君腸

琵琶

絃清撥刺語錚錚背却殘燈就月明賴是心無惆悵事
不然爭奈子絃聲

和殷協律琴思

秋水蓮冠春草裙依稀風調似文君
煩君五指分明語知是琴心佯不聞

寄李蘇州兼示楊瓊

真娘墓頭春草碧心奴鬢上秋霜白
為問蘇臺酒席中使君歌笑與誰同
就中猶有楊瓊在堪上東山伴謝公

聽彈湘妃怨

玉軫朱絃瑟瑟徽吳娃徵調奏湘妃
分明曲裏愁雲雨

似道蕭蕭郎不歸

江南新詞有云暮雨蕭蕭郎不歸

閒坐

暖擁紅爐火閒搔白髮頭百年慵裏過萬事醉中休有
空同摩詰無兒比鄧攸莫論身在日身後亦無憂

白氏長慶集卷十九

欽定四庫全書

白氏長慶集卷二十

唐白居易撰

律詩

五言七言
凡一百首

初罷中書舍人

自慙拙宦叨清貴
還有癡心怕素飧
或望君臣相獻替
可圖妻子免飢寒
性疎豈合承恩久
命薄元知濟事難
分寸寵光酬未得
不休更擬覓何官

宿陽城驛對月

自此後詩赴杭州路中作

親故尋回駕妻孥未出關鳳皇池上月送我過商山

商山路有感

并序

前年夏予自忠州刺史除書歸闕時刑部李十一侍郎
戶部崔二十員外亦自澧果二郡守徵還相次入關皆
同此路今年予自中書舍人授杭州刺史又由此途出
二君已逝予獨南行追歎興懷慨然成詠後來有與予
杓直虞平游者見此短什能無惻惻乎儻未忘情請為

繼和長慶二年七月三十日題於內鄉縣南亭云爾
憶昨徵還日三人歸路同此生都是夢前事旋成空杓
直泉埋玉虞平燭過風唯殘樂天在頭白向江東

重感

停驂歇路隅重感一長吁擾擾生還死紛紛榮又枯困
支青竹杖閒捋白髭鬚莫歎身衰老交游半已無

逢張十八負外籍

旅思正茫茫相逢此道傍曉嵐林葉闇秋露草花香白

髮江城守青衫水部郎客亭同宿處忽似夜歸鄉

赴杭州重宿棣華驛見楊八舊詩感題一絕

往恨今愁應不殊題詩梁下又踟躕羨君猶夢見兄弟
我到天明睡亦無

寓言題僧

劫風火起燒荒宅苦海波生蕩破船力小無因救焚溺
清涼山下且安禪

內鄉縣村路作

日下風高野路涼
緩驅疲馬闇思鄉
渭村秋物應如此
棗赤梨紅稻穗黃

路上寄銀匙與阿龜

謫宦心都慣
辭鄉去不難
緣留龜子住
涕淚一闌干
小子須嬌養
鄒婆為好看
銀匙封寄汝
憶我即加飧

山泉煎茶有懷

坐酌泠泠水
看煎瑟瑟塵
無由持一盃
寄與愛茶人

郢州贈別王八使君

昔是詩狂客今為酒病夫
強吟翻悵望縱醉不歡娛
鬢髮三分白交親一半無
郢城君莫厭猶校近京都

吉祥寺見錢侍郎題名

雲雨三年別風波萬里行
愁來正蕭索況見故人名

重到江州感舊遊題郡樓十一韻

掌綸知是忝剖竹信為榮
才薄官仍重恩深責尚輕
昔徵從典午今出自承明
鳳詔休揮翰漁歌欲濯纓
還乘小樓牒音樓牒小舟也却到古湓城
醉客臨江待禪僧出郭迎

青山滿眼在白髮半頭生又較三年老何曾一事成重
過蕭寺宿再上庾樓行雲水新秋思閭閻舊日情郡民
猶認得司馬詠詩聲

贈江州李十使君負外十四韻

我本江湖上悠悠任運身朝隨賣藥客暮伴釣魚人迹
為燒丹隱家緣嗜酒貧經過剡溪雪尋覓武陵人豈有
疎狂性堪為侍從臣仰頭驚鳳闕下口觸龍鱗劍珮辭
天上風波向海濱非賢虛偶聖無屈敢求伸昔去曾同

日今來即後塵

元和末與李貲外同日黜官今又相次出為刺史

中年俱白鬢

仕宦各朱輪長短才雖異榮枯事略均殷勤李貲外不

合不相親

題別遺愛草堂兼呈李十使君

李亦廬山人常隱白鹿洞

曾住爐峯下書堂對藥臺
斬新蘿徑合依舊竹窓開
砌水親開決池荷手自栽
五年方暫至一宿又須回
縱未長歸得猶勝不到來
君家白鹿洞聞道亦生苔

重題

泉石尚依依林疎僧亦稀何年辭水閣今夜宿雲扉謾
獻長楊賦虛拋薜荔衣不能成一事贏得白頭歸

夜泊旅望

少睡多愁客中宵起望鄉沙明連浦月帆白滿船霜近
海江彌濶迎秋夜更長煙波三十宿猶未到錢塘

九江北岸遇風雨

黃梅縣邊黃梅雨白頭浪裏白頭翁九江濶處不見岸
五月盡時多惡風人間穩路應無限何事拋身在此中

舟中晚起

日高猶掩水窓眠，枕簟清涼八月天。
泊處或依沽酒店，宿時多伴釣魚船。
退身江海應無用，憂國朝廷自有賢。
且向錢塘湖上去，冷吟閒醉二三年。

秋寒

雪鬢年顏老，霜庭景氣秋。
病看妻檢藥，寒遣婢梳頭。
身外名何有人間事，且休澹然方寸內。
唯擬學虛舟。

初到郡齋寄錢湖州李蘇州

聊取二郡一哂
故有落句之戲

俱來滄海郡半作白頭翁謾道風煙接何曾笑語同吏

稀秋稅畢客散晚亭空霽後當樓月潮來滿座風雪

直甲

切水名在吳興

溪殊冷僻茂苑太繁雄唯此錢塘郡間忙恰得

中

對酒自勉

五十江城守停杯一自思頭仍未盡白官亦不全卑榮
寵尋過分歡娛已校遲肺傷雖怕酒心健尚誇詩夜舞
吳娘袖春歌蠻子詞猶堪三五歲相伴醉花時

郡樓夜宴留客

北客勞相訪東樓為一開
卷簾待月出把火看潮來
艷聽竹枝曲香傳蓮子杯
寒天殊未曉歸騎且遲迴

醉題候仙亭

蹇步垂朱綬華纓映白鬚
何因駐衰老只有且歡娛
酒興還應在詩情可便無
登山與臨水猶未要人扶

東院

松下軒廊竹下房
暖簷晴日滿繩牀
淨名居士經三卷

榮啓先生琴一張老去齒衰嫌橘醋病來肺渴覺茶香
有時閒酌無人伴獨自騰騰入醉鄉

虛白堂

虛白堂前衙退後更無一事到中心移牀就月簷閒卧
臥詠閒詩側枕琴

閒夜詠懷因招周協律劉薛二秀才

世名檢束為朝士心性疎慵是野夫高置寒燈如客店
深藏夜火似僧爐香濃酒熟能嘗否冷澹詩成肯和無

若厭雅噓須俗飲妓筵勉力為君鋪

晚興

極浦收殘雨高城駐落暉山明虹半出松閣鶴雙歸將
吏隨衙散文書入務稀閒吟倚新竹筠粉汙朱衣

衰病

老與病相仍華簪髮不勝行多朝散藥睡少夜停燈祿
食分供鶴朝衣減施僧性多移不得郡政謾如繩

病中對病鶴

同病病夫憐病鶴精神不損翅翎傷未堪再舉摩霄漢
只合相隨覓稻粱但作悲吟和嘹唳難將俗貌對昂藏
唯應一事宜為伴我髮君毛俱似霜

夜歸

半醉閒行湖岸東馬鞭敲鐙轡瓏璵萬株松樹青山上
十里沙堤明月中樓角漸移當路影潮頭欲過滿江風
歸來未放笙歌散畫戟門開蠟燭紅

臘後歲前過景詠意

海梅半白柳微黃凍水初融日欲長度臘都無苦霜霰
迎春先有好風光郡中起晚聽衙鼓城上行慵倚女牆
公事漸閒身且健使君殊未厭餘杭

白髮

雪髮隨梳落霜毛繞鬢垂加添老氣味改變舊容儀不
肯長如漆無過總作絲最憎明鏡裏黑白半頭時

錢湖州以箸

如灼切

下酒李蘇州以五醖

大透切
重釀酒

酒相次寄到無因同飲聊詠所懷

勞將箸下忘憂物寄與江城賣酒翁
鐙脚三州何處會
甕頭一盞幾時同
傾如竹葉盈樽綠
飲作桃花上面紅
莫怪殷勤醉相憶
曾陪西省與南宮

花樓望雪命宴賦詩

連天際海白皚皚
好上高樓望一迴
何處更能分道路
此時兼不認池臺
萬重雲樹山頭翠
百尺花樓江畔開
素壁聯題分韻句
紅爐巡飲暖寒盃
冰鋪湖水銀為面
風捲汀沙玉作堆
絳舞人春艷曳
勾留醉客夜徘徊

輸將虛白堂前鶴失却樟亭驛後梅別有故情偏憶得
曾經窮苦照書來

晚歲

壯歲忽已去浮榮何足論身為百口長官是一州尊不
覺白雙鬢徒言朱兩轡病難施郡政老未答君恩歲暮
別兄弟年衰無子孫惹愁諳世網治苦賴空門擘

魯取切手

也帶知腰瘦看燈覺眼昏不緣衣食繫尋合返丘園

宿竹閣

晚坐松簷下宵眠竹閣間清虛當服藥幽獨抵歸山巧
未能勝拙忙應不及閒無勞別修道即此是玄關

歲暮枉衢州張使君書并詩因以長句報之

西州彼此意何如官職蹉跎歲欲除浮石潭邊停五馬
望濤樓上得雙魚萬言舊手才難敵五字新題思有餘
貧薄詩家無好物反投桃李報瓊琚

和薛秀才尋梅花同飲見贈

忽驚林下發寒梅便試花前飲冷盃白馬走迎詩客去

紅筵鋪待舞人來歌聲怨處微微落酒氣醺時旋旋開
若到歲寒無雨雪猶應醉得兩三迴

與諸客空腹飲

隔宿書招客平明飲暖寒麴神寅日合酒聖卯時歡促
膝纔飛白酡顏已渥丹碧籌攢米椀紅袖拂盤醉後
歌尤異狂來舞不難拋盃語同坐莫作老人看

小歲日對酒唸錢湖州所寄詩

獨酌無多興閒吟有所思一杯新歲酒兩句故人詩楊

柳初黃日髭鬚半白時蹉跎春氣味彼此老心知

錢塘湖春行

孤山寺北賈亭西水面初平雲脚低幾處早鶯爭暖樹
誰家新燕啄春泥亂花漸欲迷人眼淺草纔能沒馬蹄
最愛湖東行不足綠楊陰裏白沙堤

題靈隱寺紅辛夷花戲酬光上人

紫粉筆含尖火焰紅臙脂染小蓮花芳情鄉思知多少
惱得山僧悔出家

重向火

火銷灰復死疎棄已經旬豈是人情薄其如天氣春風寒忽再起手冷重相親却就紅爐坐心如逢故人

候仙亭同諸客醉作

謝安山下空攜妓柳惲洲邊只賦詩爭及湖亭今日會
嘲花詠水贈蛾眉

城上

城上鼙鼓朝衙復晚衙為君慵不出落盡遶城花

早行林下

披衣未冠櫛晨起入前林宿露殘花氣朝光新葉陰傍
松人迹少隔竹鳥聲深閒倚小橋立傾頭時一唸

送李校書赴寒食歸義興山居

大見騰騰詩酒客不憂生計似君稀到舍將何作寒食
滿船惟載樹陰歸

題孤山寺山石榴花示諸僧衆

山榴花似結紅巾容豔新妍占斷春色相故關行道地

香塵擬觸坐禪人
瞿曇弟子君知否
恐是天魔女化身

獨行

閣誦黃庭經在口
閒攜青竹杖隨身
晚花新筍堪為伴
獨入林行不要人

二月五日花下作

二月五日花如雪
五十二人頭似霜
聞有酒時須笑樂
不關身事莫思量
羲和趣日沈西海
鬼伯驅人葬北邙
只有且來花下醉
從人笑道老顛狂

戲題木蘭花

紫房日照臙脂拆素豔風吹臙粉開
怪得獨饒臙粉態
木蘭曾作女郎來

清明日觀妓舞聽客詩

看舞顏如玉聽詩韻似金
綺羅從許笑絃管不妨吟
可惜春風老無嫌酒盞深
辭花送寒食併在此時心

西湖晚歸回望孤山寺贈諸客

柳湖松島蓮花寺
晚動歸橈出道場
盧橘子低山雨重

棕櫚葉戰水風涼
煙波澹蕩搖空碧
樓殿參差倚夕陽
到岸請君回首望
蓬萊宮在海中央

湖中自照

重重照影看容鬢
不見朱顏見白絲
失却少年無覓處
泥他湖水欲何為

贈蘇鍊師

兩鬢蒼然心浩然
松窓深處藥爐前
攜將道士通宵語
忘却花光盡日眠
明鏡懶開長在匣
素琴欲弄半無絃

猶嫌莊子多詞句只讀逍遙六七篇

杭州春望

望海樓明照曙霞

城東樓名望海樓

護江堤白蹋晴沙濤聲夜

入伍負廟柳色春藏蘇小家紅袖織綾誇柿蒂

杭州出柿蒂花

者尤佳也

青旗沽酒趁梨花

其俗釀酒趁梨花時熟號為梨花春

誰開湖寺西

南路草綠裙腰一道斜

孤山寺路在湖州中草綠時望如裙腰

飲散夜歸贈諸客

鞍馬夜紛紛香街起暗塵回鞭招飲妓分火送歸人風

月應堪惜杯觴莫厭頻明朝三月盡忍不送殘春

湖亭晚歸

盡日湖亭臥心閒事亦稀起因殘醉醒坐待晚涼歸松
雨飄藤帽江風透葛衣柳堤行不厭沙軟絮霏霏

東樓南望八韻

不厭東南望江樓對海門風濤生有信天水合無痕鷗
帶雲帆動鷗和雪浪翻魚鹽聚為市煙火起成村日脚
金波碎峯頭鈿點繁送秋千里鴈報暝一聲猿已豁煩

襟悶仍開病眼昏
郡中登眺處無勝此東軒

醉中酬殷協律

泗水亭邊一分散
浙江樓上重遊陪
揮鞭二十年前別
命駕三千里外來
醉袖放狂相向舞
愁眉和笑一時開
留君夜住非無分
且盡青娥紅燭臺

孤山寺遇雨

拂波雲色重
洒葉雨聲繁
水鷺雙飛起
風荷一向翻
空濛連北岸
蕭颯入東軒
或擬湖中宿
留船在寺門

樟亭雙櫻樹

南館西軒兩樹櫻春條長足夏陰成素華朱實今雖盡
碧葉風來別有情

湖上夜飲

郭外迎人月湖邊醒酒風誰留使君飲紅燭在舟中

贈沙鷗

老逼教垂白官料遣着緋形骸雖有累方寸却無機遇
酒多先醉逢山愛晚歸沙鷗不知我猶避隼旟飛

餘杭形勝

餘杭形勝四方無州傍青山縣枕湖遶郭荷花三十里
拂城松樹一千株夢兒亭古傳名謝教妓樓新道姓蘇
州西靈隱山上有夢謝亭即是杜明浦夢謝靈
運之所因名客兒也蘇小小本錢塘妓人也獨有使
君年太老風光不稱白髭鬚

江樓夕望招客

海天東望夕茫茫山勢川形濶復長燈火萬家城四畔
星河一道水中央風吹古木晴天雨月照平沙夏夜霜

能就江樓銷暑否比君茅舍較清涼

新秋病起

一葉落梧桐年光半又空秋多上階日涼足入懷風病
瘦形如鶴愁焦鬢似蓬損心詩思裏伐性酒狂中華蓋
何曾惜金丹不致功猶須自慙愧得作白頭翁

木芙蓉花下招客飲

晚涼思飲兩三盃
召得江頭酒客來
莫怕秋無伴
醉物水蓮花盡木蓮開

悲歌

白頭新洗鏡新磨老逼身來不奈何耳裏頻聞故人死
眼前唯覺少年多塞鴻遇暖猶回翅江水因潮亦反波
獨有衰顏留不得醉來無計但悲歌

江樓晚眺景物鮮奇吟翫成篇寄水部張員外
澹煙疎雨間斜陽江色鮮明海氣涼蜃散雲收破樓閣
虹殘水照斷橋梁風翻白浪花千片鴈點青天宇一行
好著丹青圖寫取題詩寄與水曹郎

夜招周協律兼答所贈

滿眼雖多客開眉復向誰少年非我伴秋夜與君期落
魄俱耽酒殷勤共愛詩相憐別有意彼此老無兒

重酬周判官

秋愛冷吟春愛醉詩家眷屬酒家仙若教早被浮名繫
可得閒遊三十年

飲後夜醒

黃昏飲散歸來臥夜半人扶強起行枕上酒容和睡醒

樓前海月伴潮生將歸梁燕還重宿欲滅窓燈却復明
直至曉來猶妄想耳中如有管絃聲

代賣薪女贈諸妓

亂蓬為鬢布為巾曉蹋寒山自負薪一種錢塘江畔女
着紅騎馬是何人

奉和李大夫題新詩二首各六韻

因嚴亭

一作固嚴

箕穎人窮獨蓬壺路阻難何如兼吏隱復得事躋攀巖

樹羅階下江雲貯棟間似移天目石疑入武丘山清景
徒堪賞皇恩肯放閒遙知興未足即被詔徵還

忘筌亭

翠巘公門對朱軒野逕連只開新戶牖不改舊風煙空
室閒生白高情澹入玄酒客同座勸詩僭屬城傳自笑
滄江畔遙思絳帳前庭臺隨事有爭敢比忘筌

予以長慶二年冬十月到杭州明年秋九月始
與范陽盧賈汝南周元範蘭陵蕭悅清河崔

求東萊劉方輿同遊恩德寺之泉洞竹石籍
甚久矣及茲目擊果愜心期因自嗟云到郡
周歲方來入寺半日復去俯視朱綬仰睇白
雲有愧於心遂留絕句

雲水埋藏恩德洞簪裾束縛使君身慙來不宿歸州去
應被山呼作俗人

早冬

十月江南天氣好可憐冬景似春華霜輕未殺萋萋草

日暖初乾漠漠沙老柘葉黃如嫩樹寒櫻枝白是狂花
此時却羨閒人醉五馬無由入酒家

歲假內命酒贈周判官蕭協律

共知欲老流年急且喜新正假日頻聞健此時相勸醉
偷閒何處共尋春脚隨周叟行猶疾頭比蕭翁白未勻
歲酒先拈辭不得被君推作少年人

與諸客攜酒尋去年梅花有感

馬上同攜今日盃湖邊共覓去年梅年年只是人空老

處處何曾花不開詩思又牽吟咏發酒酣閒喚管絃來
樽前百事皆依舊點檢惟無薛秀才

去年與薛景文
同賞今年長逝

醉送李協律赴湖南辟命因寄沈八中丞

富陽山底樟亭畔立馬停舟飛酒盃曾共中丞情繾綣
暫留協律語踟躕紫微星北承思去青草湖南稱意無
不羨君官羨君幕幕中收得阮元瑜

內道場永謹上人就郡見訪善說維摩經臨別
請詩因以此贈

五夏登壇內殿師水為心地玉為儀正傳金粟如來偈
何用錢塘太守詩苦海出來應有路靈山別後可無期
他生莫忘今朝會虛白亭中發藥時

見李蘇州示男阿武詩自感成詠

遙羨青雲裏祥鸞正引雛自憐滄海畔老蚌不生珠

正月十五日夜月

歲熟人心樂朝遊復夜遊春風來海上明月在江頭燈
火家家市笙歌處處樓無妨思帝里不合厭杭州

題州北路傍老柳樹

皮枯緣受風霜久條短為經攀折頻但見半衰當此路
不知初種是何人雪花零碎逐年減煙葉稀疏隨分新
莫道老株芳意少逢春猶勝不逢春

題清頭陀

頭陀獨宿寺西峯百尺禪菴半夜鐘煙月蒼蒼風瑟瑟
更無雜樹對山松

自歎二首

形羸自覺朝飡減睡少偏知夜漏長
實事漸消虛事在
銀魚金帶遶腰先

二毛曉落梳頭懶兩眼春昏點藥頻
唯有閒行猶得在
心情未到不如人

湖上醉中代諸妓寄嚴郎中

笙歌杯酒正歡娛忽憶仙郎望帝都
借問連宵直南省
何如盡日醉西湖蛾眉別久心知否
雞舌含多口厭無
還有些些惆悵事春來山路見蘼蕪

自詠

悶發每吟詩引興興來兼酌酒開顏欲逢暇日先招客
正對衙時亦望山勾檢簿書多鹵莽隄防官吏少機關
誰能頭白勞心力人道無才也是閒

晚興

草淺馬翩翩新晴薄暮天柳條春拂面衫袖醉垂鞭立
語花隄上行吟水寺前等閒消一日不覺過三年

早興

晨光出照屋梁明
初打開門鼓一聲
犬上階眠知地濕
鳥臨窓語報天晴
半銷宿酒頭仍重
新脫冬衣體乍輕
睡覺心空思想盡
近來鄉夢不多成

竹樓宿

小書樓下千竿竹
深火爐前一盞燈
此處與誰相伴宿
燒丹道士坐禪僧

湖上招客送春汎舟

欲送殘春招酒伴
客中誰最有風情
兩瓶箸下新開得

一曲霓裳初教成

時崔湖州寄新箬下酒來
樂妓案霓裳羽衣曲初畢

排比管絃

行翠袖指麾船舫點紅旌慢牽好向湖心去恰似菱花

鏡上行

戲醉客


莫言魯國書生懦莫把杭州刺史欺醉客請君開眼望
綠楊風下有紅旗

紫陽花

招賢寺有山花一樹無人知名色紫氣
香芳麗可愛頗類仙物因以紫陽花名

之

何年植向仙壇上早晚移栽到梵家雖在人間人不識
與君名作紫陽花



白氏長慶集卷二十

欽定四庫全書

集部

白氏長慶集卷二十一

詳校官監察御史臣查瑩

檢討臣何思鈞覆勘

總校官知縣臣繆琪

校對官助教臣卞惟吉

謄錄監生臣張同履

欽定四庫全書

白氏長慶集卷二十一

唐白居易撰

後序

前三年元微之為予編次文集而敘之凡五帙每帙十卷訖長慶二年冬號白氏長慶集邇來復有格詩律詩碑誌序記表贊以類相附合為卷軸又從五十一以降卷而第之是時太和二年秋予春秋五十有七目昏頭

白衰也久矣拙音狂句亦已多矣由茲而後宜其絕筆
若餘習未盡時時一詠亦不自知也因附前集報微之
故復序于卷首云爾

按此序宜與元相序同列帙首今
通考諸本俱附此卷姑仍其舊

格詩謔行雜體

凡五十七首

郡齋旬假命宴呈座客示郡寮

自此後在
蘇州作

公門日兩衙公假月三旬衙用決簿領旬以會親賓公
多及私少勞逸常不均況為劇郡長安得閒宴頻下車
已二月開筵始今晨初黔軍厨突一拂郡榻塵既備獻

酬禮亦具水陸珍萍醅箬溪醑水鱠松江鱗侑食樂懸
動佐懽妓席陳風流吳中客佳麗江南人歌節點隨袂
舞香遺在茵清奏凝未闌醺顏氣已春衆賓勿遽起群
寮且逡巡無輕一日醉用犒九日勤微彼九日勤何以
治吾民微此一日醉何以樂吾身

題西亭

朝亦視簿書暮亦視簿書簿書視未竟蟋蟀鳴座隅始
覺芳歲晚復嗟塵務拘西園景多暇可以少躊躇池鳥

澹容與橋柳高扶疎煙蔓媚青薜水花披白蕖何人造
茲亭華敞綽有餘四簷軒鳥翅複屋羅蜘蛛直廊抵曲
房窈鋤交切窈窈深土了切且虛修竹夾左右清風來徐徐
此宜宴佳賓鼓瑟吹笙竽荒淫即不可廢曠將何如幸
有酒與樂及時歡且娛忽其解郡印他人來此居

郡中西園

閒園多芳草春夏香靡靡深樹足佳禽旦暮鳴不已院
門閉松竹庭徑穿蘭芷愛彼池上橋獨來聊徙倚魚依

藻長樂鷗見人暫起有時舟隨風盡日蓮照水誰知郡
府內景物閒如此始悟誼靜緣何嘗繫遠邇

北亭臥

樹綠晚陰合池涼朝氣清蓮開有佳色鶴唳無凡聲唯
此閒寂境愜我幽獨情病假十五日十日臥茲亭明朝
吏呼起還復視黎氓

一葉落

煩暑鬱未退涼飈潛已起寒溫與盛衰遞相為表裏蕭

蕭秋林下一葉忽先委勿言微搖落搖落從此始

崔湖州贈紅石琴薦煥如錦文無以答之以詩

酬謝

蘋錦支綠綺韻同相感深千年古澗石八月秋堂琴引出山水思助成金玉音人間無可比比我與君心

九日宴集醉題郡樓兼呈周殷二判官

前年九日餘杭郡呼賓命宴虛白堂去年九日到東洛今年九日來吳鄉兩邊蓬鬢一時白三處菊花同色黃

一日日知添老病
一年年覺惜重陽
江南九月未搖落
柳青蒲綠稻穗香
姑蘇臺榭倚蒼靄
太湖山水含清光
可憐假日好天色
公門吏靜風景涼
榜舟鞭馬取賓客
掃樓拂席排壺觴
胡琴錚鏦指撥刺
吳娃美麗眉眼長
笙歌一曲思凝絕
金鈿再拜光低昂
日脚欲落備燈燭
風頭漸高加酒漿
觥盞艷翻菖蒲葉
舞鬟擺落茱萸房
半酣憑檻起四顧
七堰八門十六坊
遠近高低寺閒出
東西南北橋相望
水道脈分棹鱗次
里閭碁布城冊方

人煙樹色無隙罅十里一片青茫茫自問有何才與政
高廳大館居中央銅魚今乃澤國節刺史是古吳都王
郊無戎馬郡無事門有榮戟腰有章盛時儻來合慚媿
壯歲忽去還感傷從事醒歸應不可使君醉倒亦何妨
請君停盃聽我語此語真實非虛狂五旬已過不為夭
七十為期蓋是常須知菊酒登高會從此多無二十場
同微之贈別郭虛舟鍊師五十韻

我為江司馬君為荊判司俱當愁悴日始識虛舟師師

年三十餘白晳好容儀專心在鉛

音汞

呼孔切
水銀

餘力工

琴棋靜彈絃數聲閒飲酒一卮因指塵土下蜉蝣良可
悲不聞姑射上千歲冰雪肌不見遼城外古今塚累累
嗟我天地間有術人莫知得可逃死籍不唯走三尸授
我參同契其辭妙且微六一闕扁鐻子午守雄雌我讀
隨日悟心中了無疑黃芽與紫車謂其坐致之自負因
自歎人生號男兒若不珮金印即合翳玉芝高謝人間
世深結山中期泥壇方合矩鑄鼎圓中規鑪橐一以動

瑞氣紅輝輝齊心獨歎拜中夜偷一窺二物正訴合殿
狀何怪奇綢繆夫婦體狎獵魚龍姿簡寂館鍾後紫霄
峰曉時心塵未淨潔火候遂參差萬壽覲刀圭千功失
毫釐先生彈指起蛇女隨煙飛始知緣會閒陰隲不可
移藥竈今夕罷詔書明日追追我復追君次第承恩私
官雖小大殊同立白玉墀我直紫微闥手進賞罰詞君
侍玉皇座口含生殺機直躬易媒孽浮俗多瑕疵轉徙
今安在越嶠吳江湄一提支郡印一建連帥旗何言四

百里不見如天涯秋風旦夕來白日西南馳雪霜各滿
鬢朱紫徒為衣師從廬山洞訪舊來於斯尋君又覓我
風馭紛逶迤帔裾曳黃綃鬚髮垂青絲逢人但斂手問
道亦頷頤孤雲難久留十日告將歸款曲話平昔殷勤
勉衰羸後會杳何許前心日磷緇俗家無異物何以充
別資素牋一百句題附元家詩朱頂鶴一隻與師雲間
騎雲間鶴背上故情若相思時時摘一句唱作步虛辭

霓裳羽衣歌

和微之

我昔元和侍憲皇曾陪內宴宴昭陽千歌百舞不可數

就中最愛霓裳舞舞時寒食春風天玉鉤欄下香案前

案前舞者顏如玉不着人家俗衣服虹裳霞帔步搖冠

鈿璫累累珮珊珊娉婷似不任羅綺顧聽樂懸行復止

磬簫箏笛遞相攙擊擲彈吹聲遞迤

凡法曲之初衆樂不齊唯金石絲竹

次第發聲霓裳序初亦復如此

散序六奏未動衣陽臺宿雲慵不飛

散序

六遍無拍故不舞也

中序擘騁

霍虢切

初入拍秋竹竿裂春冰折

中序

始有拍亦名拍序

飄然轉旋迴雪輕嫣然縱送游龍驚小垂手

後柳無力斜曳裾時雲欲生

四句皆霓裳舞之初態

煙蛾斂略不

勝態風袖低昂如有情上元點鬟招萼綠王母揮袂別

飛瓊

許飛瓊萼綠華皆女仙也

繁音急節十二遍跳珠撼玉何鏗錚

霓裳曲十
二遍而終
翔鸞舞了却收翅唳鶴曲終長引聲

凡曲將畢皆聲

拍促速惟霓裳之末長引一聲也

當時乍見驚心目凝視諦聽殊未足

一落人閒八九年耳冷不曾聞此曲湓城但聽山魃語

巴峽唯聞杜鵑哭

予自江州司馬轉忠州刺史

移領錢塘第二年始

有心情問絲竹玲瓏篴篥謝好箏陳寵感栗沈平笙清

絃脆管纖纖手教得霓裳一曲成

自玲瓏以下皆杭之妓名

虛白亭

前湖水畔前後祇應三度按便除庶子拋却來聞道如
今各星散今年五月至蘇州朝鐘暮角催白頭貪看案
牘常侵夜不聽笙歌直到秋秋來無事多閒悶忽憶霓
裳無處問聞君部內多樂徒問有霓裳舞者無答云十
縣十萬戶無人知有霓裳舞唯寄長歌與我來題作霓
裳羽衣譜四幅花牋碧間紅霓裳實錄在其中千姿萬
狀分明見恰與昭陽舞者同眼前髣髴覩形質昔日今

朝想如一疑從魂夢呼名來似著丹青圖寫出我愛霓

裳君合知發於歌詠形於詩君不見我歌云驚破霓裳

羽衣曲

長恨歌云

又不見我詩云曲愛霓裳未拍時

錢塘詩云

由

來能事皆有主楊氏創聲君造譜

開元中西涼府節度楊敬述造

君言

此舞難得人須是傾城可憐女吳妖小玉飛作煙

夫差女小

玉死後形見於王其母抱之霏微若煙霧散空

越豔西施化為土嬌花巧笑久

寂寥娃館苧蘿空處所如君所言誠有是君試從容聽

我語若求國色始翻傳但恐人間廢此舞妍媸優劣寧

相遠大都只在人擡舉李娟張態君莫嫌亦擬隨宜且

教取

娟態蘇
妓之名

小童薛陽陶吹簫栗歌

和浙西李
大夫作

剪削乾蘆插寒竹九孔漏聲五音足近來吹者誰得名
關雎老死李衮生衮今又老誰其嗣薛氏樂童年十二
指點之下師授聲含嚼之間天與氣潤州城高霜月明
吟霜思月欲發聲山頭江底何悄悄猿聲不喘魚龍聽
翕然聲作疑管裂訕然聲盡疑刀截有時婉軟無筋骨

有時頓挫生稜節急聲圓轉促不斷
轆轤轆轤似珠貫
緩聲展引長有條有條直直如筆描
下聲乍墜石沈重
高聲忽舉雲飄蕭明旦公堂陳宴席
主人命樂娛賓客
碎絲細竹徒紛紛宮調一聲雄出群
衆音覲郎何切縷不落
道有如部伍隨將軍嗟爾陽陶方稚齒
下手發聲已如此若教頭白吹不休
但恐聲名壓闕李

啄木曲

莫買寶剪刀虛費千金直
我有心中愁知君剪不得莫

磨解結雖虛勞人氣力我有腸中結知君解不得莫染
紅絲線徒誇好顏色我有雙淚珠知君穿不得莫近紅
爐火炎氣徒相逼我有兩鬢霜知君消不得刀不能剪
心愁雖不能解腸結線不能穿淚珠火不能銷鬢雪不
如飲此神聖杯萬念千憂一時歇

題靈巖寺

寺即吳館娃宮鳴廊
硯池採香徑遺跡在焉

娃宮麝廊尋已傾硯池香徑又欲平
二三月時但草綠
幾百年來空月明使君雖老頗多思
攜觴領妓處處行

今愁古恨入絲竹一曲涼州無限情
直自當時到今日
中間歌吹更無聲

雙石

蒼然兩片石厥狀怪且醜俗用無所堪
時人嫌不取結
從胚渾始得自洞庭口萬古遺水濱
一朝入吾手擔舁
來郡內洗刷去泥垢孔黑煙痕深鏽青苔色厚老蛟蟠
作足古劍插為首忽疑天上落不似人間有一可支吾
琴一可貯吾酒峭絕高數尺坳泓容一斗五絃倚其左

一杯置其右窪樽酌未空玉山頽已久人皆有所好物
各求其偶漸恐少年場不容垂白叟迴頭問雙石能伴
老夫否石雖不能言許我為三友

宿東亭曉興

溫溫土爐火耿耿紗籠燭獨抱一張琴夜入東齋宿窓
聲渡殘漏簾影浮初旭頭癢曉梳多眼昏春睡足負暄
簷宇下散步池塘曲南鴈去未迴東風來何速雪依瓦
溝白草遶牆根綠何言萬戶州太守常幽獨

日漸長贈周殷二判官

日漸長春尚早牆頭半露紅萼枝池岸新鋪綠芽草蹋
草攀枝仰頭歎何人知此春懷抱年顏盛壯名未成官
職欲高身已老萬莖白髮真堪恨一片緋衫何足道賴
得君來勸一杯愁開悶破心頭好

花前歎

前歲花前五十二今年花前五十五歲課年功頭髮知
從霜成雪君看取

五年前在杭州有詩
云五十二人頭似霜

幾人得老莫自

嫌樊李吳韋盡成土

樊絳州宗師李諫議景儉吳饒州丹韋侍郎顗皆舊往還相繼喪逝

南州桃李北州梅且喜年年作花主花前置酒誰相勸

容坐唱歌滿起舞

容滿皆妓名也

欲散重拈花細看爭知明日

無風雨

自詠五首

朝亦隨羣動暮亦隨羣動榮華瞬息閒求得將何用形骸與冠蓋假合相戲弄何異睡着人不知夢是夢

一家五十口一郡十萬戶出為差科頭入為衣食主水

早合心憂飢寒須手撫何異食蓼蟲不知苦是苦

公私頗多事衰憊殊少歡迎送賓客懶鞭笞黎庶難老
耳倦聲樂病口厭盃盤既無可戀者何以不休官

一日復一日自問何留滯為貪逐日俸擬作歸田計亦
須隨豐約可得無限劑若待足始休休官在何歲

官舍非我廬官園非我樹洛中有小宅渭上有別墅既
無婚嫁累幸有歸休處歸去誠已遲猶勝不歸去

和微之聽妻彈別鶴操因為解釋其義依韻加

四句

義重莫若妻生離不如死誓將死同穴其奈生無子商
陵追禮教婦出不能止舅姑明旦辭夫妻中夜起起聞
雙鶴別若與人相似聽其悲唳聲亦如不得已青田八
九月遼城一萬里徘徊去住雲鳴咽東西水寫之在琴
曲聽者酸心髓況當秋月彈先入憂人耳怨抑掩朱絃
沈吟停玉指一聞無兒歎相念兩如此無兒雖薄命有
妻偕老矣幸免生別離猶勝商陵氏

題故元少尹集後二首

黃壤詎知我白頭徒憶君
唯將老年淚一洒故人文
遺文三十軸軸金玉聲
龍門原上土埋骨不埋名

和微之四月一日作

四月一日天花稀葉陰薄
泥新燕影忙蜜熟蜂聲樂
麥風低冉冉稻水平漠漠
芳節或蹉跎遊心稍牢落
春華信為美夏景亦未惡
颭浪嫩青荷熏欄晚紅藥
吳宮好風月越郡多樓閣
兩地誠可憐其奈久離索

吳中好風景二首

吳中好風景八月如三月水荇葉仍香木蓮花未歇海
天微雨散江郭纖埃滅暑退衣服乾潮生船舫活兩衙
漸多暇亭午初無熱騎吏語使君正是遊時節

吳中好風景風景無朝暮曉色萬家煙秋聲八月樹舟
移管絃動橋擁旌旗駐改號齊雲樓重開武丘路況當
豐歲熟好是歡遊處州民勸使君且莫拋官去

答劉禹錫白太守行

吏滿六百石昔賢輒去之秩登二千石今我方罷歸我
秩訝已多我歸慙已遲猶勝塵土下終老無休期臥乞
百日告起吟五篇詩謂將罷官自咏五首朝與府吏別暮與州民
辭去年到郡時麥穗黃離離今年去郡日稻花白霏霏
為郡已周歲半歲罹旱飢襦袴無一片甘棠無一枝何
乃老與幼泣別盡沾衣下慙蘇人淚上愧劉君辭

附白太守行

劉禹錫

聞有白太守拋官歸舊谿蘇州十萬戶盡作嬰兒啼

太守駐行舟閭門草萋萋揮袂謝啼者依然兩眉低
朱戶非不崇我心如重徃華池非不清意在寥廓栖
夸者竊所怪賢者默思齊我為太守行題在隱起珪

別蘇州

浩浩姑蘇民鬱鬱長洲城來慙荷寵命去愧無能名青
紫行將吏班白列黎甿一時臨水拜十里隨舟行餞筵
猶未收征棹不可停稍隔煙樹色尚聞絲竹聲悵望武
丘路沈吟許水亭還鄉信有興去郡能無情

卯時酒

佛法讚醍醐仙方誇沆

何黨切

瀼

奚介切

未如卯時酒神速

功力陪一盃置掌上三嚙入腹內煦若春貫腸暄如日

灸背豈獨肢體暢仍加志氣大當時遺形骸竟日忘冠

帶似遊華胥國疑反混元代一性既完全萬機皆破碎

半醒思往來往來吁可怪寵辱憂喜閒惶惶二十載前

年辭紫闥今歲拋皂蓋去矣魚返泉超然蟬離蛻是非

莫分別行止無疑礙浩氣貯胸中青雲委身外捫心私

自語自語誰能會五十年來心未如今日泰況茲盃中
物行坐長相對

自問行何遲

前月發京口今辰次淮涯二旬四百里自問行何遲還
鄉無他計罷郡有餘資進不慕富貴退未憂寒飢以此
易過日騰騰何所為逢山輒倚棹遇寺多題詩酒醒夜
深後睡足日高時眼底一無事心中百不知想到京國
日懶放亦如斯何必冒風水促促赴程歸

除日答夢得同發楚州

共作千里伴俱為一郡迴
歲陰中路盡鄉思先春來
山雪晚猶在淮冰晴欲開
歸歟吟可作休戀主人杯

問楊瓊

古人唱歌兼唱情
今人唱歌唯唱聲
欲說向君君不會
試將此語問楊瓊

有感三首

鬢髮已斑白衣綬
方朱紫窮賤當壯年
富榮臨暮齒車

輿紅塵合第宅青煙起彼來此須去品物之常理第宅
非吾廬逆旅暫留止子孫非我有委蛻而已矣有如蠶
造繭又似花生子子結花暗凋繭成蠶老死悲哉可奈
何舉世皆如此

莫養瘦馬駒莫教小妓女後事在目前不信君看取馬
肥快行走妓長能歌舞三年五歲閒已聞換一主借問
新舊主誰樂誰辛苦請君大帶上把筆書此語

往事勿追思追思多悲愴來事勿相迎相迎已惆悵不

如兀然坐不如塌然臥食來即開口睡來即合眼二事
最關身安寢加餐飯忘懷即行止委命隨修短更若有
興來狂歌酒一盞

宿滎陽

生長在滎陽少小辭鄉曲迢迢四十載復向滎陽宿去
時十一二今年五十六追思兒戲時宛然如在目舊居
失處所故里無宗族豈唯變市朝兼亦遷陵谷獨有溱
洧水無情依舊綠

經溱洧

落日駐行騎沈吟懷古情
鄭風變已盡溱洧至今清
不見士與女亦無芍藥名

就花枝

就花枝移酒海今朝不醉
明朝悔且筭歡娛逐日來
任他容鬢隨年改醉翻衫
袖拋小令笑擲骰盤呼大
采自量氣力與心情三五
年間猶得在

喜雨

圃旱憂葵堇農旱憂禾菽人各有所私我旱憂松竹松
乾竹焦死眷眷在心目灑葉漑其根汲水勞僮僕油雲
忽東起涼雨淒相續似面洗垢塵如頭得膏沐千柯習
習潤萬葉欣欣綠十日澆灌功不如一霖莫白切霖莫卜切
方知宰生靈何異活草木所以聖與賢同心調玉燭

題道宗上人十韻 并序

普濟寺律大德宗上人法堂中有故相國鄭司徒歸尚
書陸刑部元少尹及今吏部鄭相中書韋相錢左丞詩

覽其題皆與上人唱酬閱其人皆朝賢省其文皆義語
予始知上人之文為義作為法作為方便智作為解脫
性作不為詩而作也知上人者云爾恐不知上人者謂
為護國法振靈一皎然之徒與故予題二十句以解之
如來說偈讚菩薩著論議是故宗律師以詩為佛事一
音無差別四句有詮次欲使第一流皆知不二義精潔
霑戒體閒淡藏禪味從容恣語言縹緲離文字旁延邦
國彥上達王公貴先以詩句牽後令入佛智人多愛師

句我獨知師意不似休上人空多碧雲思

寄皇甫賓客

名利既兩忘形體方自遂臥掩羅雀門無人驚我睡睡
足抖擻衣閒步中庭地食飽摩挲腹心頭無一事除却
玄晏翁何人知此味

寄庾侍郎

一雙華亭鶴數片太湖石嶢嶢蒼玉峯矯矯青雲駟是
時歲云暮淡薄煙景夕庭霜封石稜池雪印鶴迹幽致

竟誰別閒靜聊自適懷哉庾順之好是今宵客

寄崔少監

微微西風生稍稍東方明入秋神骨爽琴曉絲桐清彈
為古宮調玉水寒冷冷自覺絃指下不是尋常聲須臾
羣動息掩琴坐空庭直至日出後猶得心和平惜哉意
未已不使崔君聽

醉題沈子明壁

不愛君池東十叢菊不愛君池南萬竿竹愛君簾下唱

歌人色似芙蓉聲似玉我有陽關君未聞若聞亦應愁
殺君

勸酒

勸君一杯君莫辭勸君兩杯君莫疑勸君三杯君始知
面上今日老昨日心中醉時勝醒時天地迢遙自長久
白兔赤烏相趁走身後堆金挂北斗不如生前一樽酒
君不見春明門外天欲明喧喧歌哭半死生遊人駐馬
出不得白輦素車爭路行歸去來頭已白典錢將用買

酒喫

落花

留春春不住春歸人寂寞厭風風不定風起花蕭索既
興風前歎重命花下酌勸君嘗綠醅教人拾紅萼桃飄
火焰焰梨墮雪漠漠獨有病眼花春風吹不落

對鏡吟

白頭老人照鏡時掩鏡沈吟吟舊詩二十年前一莖白
如今變作滿頭絲

余二十年前嘗有詩云白髮生一莖
朝來明鏡裏勿言一莖少滿頭從此

始今則吟罷迴頭索杯酒醉來屈指數親知老於我者
滿頭矣

多窮賤設使身存寒且飢少於我者半為土墓樹已抽
三五枝我今幸得見頭白祿俸不薄官不卑眼前有酒
心無苦只合歡娛不合悲

耳順吟寄敦詩夢得

三十四十五慾牽七十八十百病纏五十六十卻不惡
恬淡清淨心安然已過愛貪聲利後猶在病羸昏耄前
未無筋力尋山水尚有心情聽管絃閒開新酒嘗數盞

醉憶舊詩吟一篇敦詩夢得且相勸不用嫌他耳順年

別氊帳火爐

憶昨臘月天北風三尺雪年老不禁寒夜長安可徹賴
有青氊帳風前自張設復此紅火爐雪中相暖熱如魚
入淵水似兔藏深穴婉軟蟄鱗蘇溫燉凍肌活方安陰
慘夕遽變陽和節無奈時候遷豈是恩情絕毳簾詰念切
逐日卷香燎隨灰滅離恨屬三春佳期在十月但令此
身健不作多時別

六年春贈分司東都諸公

時為河南尹

我為同州牧內愧無才術忝擢恩已多遭逢幸非一偶
當穀賤歲適值民安日郡縣獄空虛鄉閭盜奔逸其閒
最幸者朝夕多分秩行接駕鷺羣坐成芝蘭室時聯拜
表騎閒動題詩筆夜雪秉燭遊春風攜榼出花教鶯點
檢柳付風排比法酒淡清漿含桃媚紅實洛童調金管
盧女鏗瑤瑟黛慘歌思深腰凝舞拍密每因同醉樂自
覺忘衰疾始悟肘後方不如盃中物生涯隨日過世事

何時畢老子苦乖慵希君數牽率

九日代羅樊二妓招舒著作

齊梁格

羅敷斂雙袂樊姬獻一盃不見舒負外秋菊為誰開

憶舊遊

寄劉蘇州

憶舊遊舊遊安在哉舊遊之人半白首舊遊之地多蒼苔江南舊遊凡幾處就中最憶吳江隈長洲苑綠柳萬樹齊雲樓春酒一盃閭門曉嚴旗鼓出臯橋夕開船舫迴修蛾慢臉燈下醉急管繁絃頭上催六七年前狂爛

慢三千里外思徘徊李娟張態一春夢周五殷三歸夜
臺虎丘月色為誰好娃宮花枝應自開賴得劉郎解吟

詠江山氣色合歸來

娟態蘇州妓名
周殷蘇州從事

答崔賓客晦叔十二月四日見寄

來篇云共相
呼喚醉歸來

今歲日餘二十六來歲年登六十二尚不能憂眼下身
因何更筭人閒事居士忘筌默默坐先生枕麴昏昏睡
早晚相從歸醉鄉醉鄉去此無多地

勸我酒

勸我酒我不辭請君歌歌莫遲歌聲長辭亦切此辭聽者堪愁絕洛陽兒女面似花河南大尹頭如雪

贈韋處士六年夏大熱旱

驕陽連毒暑動植皆枯槁旱日乾密雲炎煙焦茂草少

壯猶困苦況予病且老脫無白梅檀何以除熱惱

華嚴經云

以白梅檀塗身能除一切熱惱而得清涼也

汗巾束頭鬢羶食熏襟抱始覺

韋山人休糧散髮好

白氏長慶集卷二十一